

Vernes Subašić

IZDAVAČ**buybook**

Radićeva 4, Sarajevo
Tel: + 387 33 550-495
Fax: + 387 33 550-496
redakcija@buybook.ba
www.buybook.ba

buybook

Turinina 7, Zagreb
Tel: + 385 98 232-813
info@buybook.hr

Udruženje građana "Slovo Gorčina"

Don Lazara Lazarevića bb, Stolac
info@slovogorcina.ba

ZA IZDAVAČA

Damir Uzunović
Goran Samardžić
Lada Jurković
Gorčin Dizdar

Papagaj sloboda, Vernes Subašić
Copyright © Vernes Subašić, 2020.
Copyright © za bh. izdanje Buybook, 2020.

Sva prava pridržana. Nijedan dio ove knjige ne smije se reproducirati u bilo kojem obliku bez prethodnog dopuštenja izdavača.

UREDNIKA

Adrijana Vidić

TEHNIČKA UREDNIKA

Ida Hamidović

LAYOUT

Boriša Gavrilović

DIZAJN NASLOVNICE

Aleksandra Nina Knežević

ŠTAMPA

Dobra knjiga, Sarajevo

Vernes Subašić

PAPAGAJ SLOBODA

Savremena bh.
književnost



**SLOVO
GORČINA**

Sarajevo / Zagreb / Stolac, 2020.

PAPAGAJ SLOBODA

EMININ MACONDO

Volim se verati
po ruinama vremena,
iz njih isparavaju tajne priče.

Neka tuga rosi zidove Emininog Maconda
kroz njene riječi: *moje me selo manje voli*
otkad studiram književnost.
Ljudi su tu divni i susretljivi.

Odgađaju sudnji dan,
podupiru veliki nišan
koji turbanom teži ka tlu.

Religiozni su to ljudi,
u slast ispijam šljivu s njima.

S vidikovca posmatram
rijetko viđeno vijuganje rijeke
koja zna dezorijentisati.

U džamiji Sv. Marije s drvenom munarom
djeca uče mukabelu.
Kula krije zbirku
kraljevske tradicionalne nošnje.

SVETI CIAPPELLETTO

sjeća li se ko boccaccia
s kraja *mračnog* srednjeg vijeka?
već u prvoj noveli, panfilo ispriča
kako to u stvari ide

ciappelletto, bitanga
na smrti se dao ispovjediti
jednom pobožnom fratri
(prešutjevši pravu istinu o sebi)
priznao *velike* grijeha:
postio više nego treba
bogatstvo dijelio sirotinji
gnušao se na taštinu mladeži
svjedočio nasilju nad ženama
za neradnog dana radio
jednom pljunuo u hramu božijem
u djetinjstvu opsovao mater svoju

prevareni fratar vidjevši
zbog kojih to malih grijeha ovaj se kaje
predloži ga za sveca
što nakon smrti njegove bi i usvojeno

*

ovdje se sjetih muje
i vica:
došao mujo s hadža
i pravo u granap
gdje je kupovao na crtu
koliko imam u teci? upita
oko tristo, reče prodavačica
deder tu pored "mujo"
sad upiši "hadži mujo"

ZID POZDRAVA

*Kada pozdravom pozdravljeni budete,
ljepšim od njega otpozdravite ili uzvratite,
jer će Allah za sve obračun tražiti.
(En-Nisa, 86.)*

Kada ovdje neko izusti *dobar dan*
kao da koprivu provuče kapilarima.
Jednom je profesor Vjeronauke
dobio odgovor: *Božija milost s tobom.*
Očiju razrogačenih od koprive
u kapilarima njegovim reče:
Neka te bude sram!

Svaki selam
pomozi Bog
hvaljen Isus i Marija
kao nova cigla
obojena
kojom biju, pod zidom, pod zidom
sazidanim između
kao pogledima što se zida
dobar dan.

BROJANJE

Uvijek sam pokušavao
prebrojati ljude
načičkane oko Kabe.
Prosto me proganjao broj s te slike.
Odlasci kod dide i nane značili su brojanje.

Čim se otvore ulazna vrata
ugledam je onako crno sjajnu
i sve te nesavršeno naslikane ljude
koji se pretapaju jedan u drugog:
jedna glava dva tijela,
dvije glave jedno tijelo,
a ja mahnito brojim.

Na dan kad sam
došao do rješenja,
došao sam
i do modrog oka.

Njima se
izgleda
nije svidjelo
križanje
prebrojanih.